

Jü Carta San Pablota Guosa Huëpo Jiojteri Timoteotahui

Teboteri

1 ¹Ínapo, Pablo, Jesucristota apóstol Diosta éäpo, jü jíapsita itom mák rókakä pámani, Cristo Jesústa huämi. ²In usiahuari nakhuame Timoteotahui. Diosta tü ehuamta, entok yore nák jiokolëhui, entok yánti jíapsihuame emo béchibotunake, itom Áchay Diosta bétana, entok itom Señor Jesucristota bétana.

Cristota bétana nokhuame

³Diostane baysauhue, Áapörükú in tekipanoä béchibo, kaachin éaka, jume in yoyohuaripo naateka. Emoune huáate, Diostau enchi buanriaka taahuarit entok tukaarit naa búrujti. ⁴Jíbane emou huáate, entok em ópuammehui, entokne enchi bít péiya, al-leerimmeyi ino tápunia báreka. ⁵Bueitukne áu huáate, juka huitti Diostat éehuäu em jípurëhui. Bát ä jípurey, jü em ma yohue Loida, entok em áiye Eunice. Én éntokne tüisi jüneiya, enchi két ä jípurëhui. ⁶Kíalíkune ínel emou jiaahua: Áuhuë ä jáyaktitua, juka Diosta

bétana em mabet-ri, júnaköri nee emo béppa mamteko.

⁷Bueituk Dios kaa espíriutu nahui éehuamta itom mik-la, ál-la juka espíritu úttiakamta, entok yore nákhuanamta entok huitti éaka áu yüihuamta. ⁸Íari béchibë kaa tihueka nooka, itom Señorta bétana; entok katë ínoy tiihue, bueitukne Áa béchibo perreesotaka aane. Ál-lë jiokot machisi ansimeka júne át huéiye jü evangeliochi, Diosta úttiärammeyi. ⁹Dios huépul éehuamta itom jípu íaaka itom jínëuk entok santosi itom núnnuk, kaa itom ára jita joä béchibo, ál-la ínel ä yuktialä béchibo, bueituk yore jiokolihuanamta itom mákkak, Cristo Jesústa huämi, bannaataka kee jee ániata ayukäpo naateka. ¹⁰Ä tü éehuäpo Jesucristo itom jínëumta yeu machiriala. Áapo juka kókkohuanamta kaitapo tahuariaka itom úuhuaaka, machikun juka jíapsihuamta yeu tójjak, entok evangeliota huám jíbapo béchibo kaa kókkohuanamta.

¹¹Dios nee áma yuktiala, apóstolpo entok maestropo nee nok íaaka, jume kaa judíommehui.

¹²Íari béchibo yún jiokot machika inou simla. Tène kaa áy tiihue, bueituk ínapo júneiya jábeta ín súalekähui; entokne tüisi júneiya: Áapo símek béppa úttiaka ín jíapsi érianake, huári taahuarit äbo huémtachi.

¹³Katë ä tójjá, huaka nokta tülisi huémnta, ino bétana em jíkkajakähui, juka Diostat éhuamta entok yore nákhuaamta Jesucristota bétana ayukamta.

¹⁴Juka símek béppa türík itom mák-rite éria, Espíritu Santota ítot ané béchibo.

¹⁵Béjé júneiya, síme jume Asia buiärapo joome nechim tö sájjak; ámemak náikiari, jú Figeelo entok Hermoogenes. ¹⁶Diosta yore jiokolëu ámeu ayunake, jú Onesíforota familiabehui, bueituk áapo juebénasi jíapsi yéjtehuamta ínou nüpak, entok kaa ínuy tiihuek, nee pereeotuk junne. ¹⁷Ál-la buere joära Romau yepsaka kaa jimyoreka nee jariu táytek, nee ä téäu núkisi. ¹⁸Diosta yore jiokolëu áa béchibotunake, Señorta éä pámani, huári taahuarichi. Émpë tüisi júneiya, jáchin itom ä aniakähui jum pueblo Efesopo.

Jesucristota tü sontaaro

2 ¹Én éntok empo, Diosta sualhuäpo ín üusi, úttiätë áma nüye, jum Diosta nésaupo ára jita johuäpo, Jesucristota bétana. ²Juka juebenam bíchäpo nokaka ino bétana em jíkkajakäu, íkäre ámeu noknake, jume oohuimmehui, kaa emo náyoteka huitti katemmehui; íméchiri jume

huatem ára majtiahüäu yúmalasi ámet ayunake.

³Empo jiokot kókosi éake jíäpsa, Jesucristotau türi sontarotaka bénasi. ⁴Jábe sontaro júne ä tékil tójaka kara täbui tékilpo áu sütia, bueituk huaka sontaro tékilpo ä núnukamta al-leetua báreka.

⁵Entok kétchi jum yeyhuäpo yö báreka úttiata joame, kaibu yölatata tahuanake, juka reglata jíäpo áman kaa yeehuekäteko.

⁶Jü buíata éechame bát tekipanuanake, juka etta chúpey ä nü béchibo. ⁷Áachë suuhua, jú ín nokäbechi; bueituk Áapo jú Señor símekut enchi át júneetuanake.

⁸Jesucristotahuë huáate, rey Davidta animmak huéeri, entok kókkolam násuk jíabitekame, ín evangelio jáauläpo. ⁹Íkái nokta béchibone kókosi jiokot johua. Juëna yöremta bénasine preeoteri; tē jú Diosta nooki kaa preeeso. ¹⁰Inëline kaa huanti símeta mabeta, jume Diosta bétana yeu púarim nákeka, bempörim két jínëuriata am jájamnakë béchibo, Jesucristotau huämi, símek béppa ujyori kaa lülütemtamaki.

¹¹Íri nooki tua lütüria: Bueituk áamak kókkokätek, kette Áamak jíapsinake;

¹²jiokot aneka jíäpsakätek, áamakte nésaunake.

Ítapo kaa ito ä täya tíäteko, áapo két kaa itom áu täya tíanake.

¹³Ítapo kaa lütula katëtek, Áapo jíbapo béchibo lütulay. Bueituk Áapo, “kanne ájária”, ti kara jiaahua.

Jü ä tekipanoäpo tüisi huéme

¹⁴Íkäre ámeu huáati sáuhue, Señorta bíchäpo, huitti ámeu nokaka: “Katem náu nok nássua.” Íri kaitäpo tatahua; ál-la juka emo táruhuamta ámeu johua, jume ä jíkkajammehui. ¹⁵Símete tülisi yáaka, Diostau emo yeu ketcha, tekipanualero ténasi, kaita tihueka, Diosta noki lútula ä huëpo áman ä nooka. ¹⁶Katë kía kaa türik kía kuttílasi yun nooka, bueítuk jü junéli bem kía nokähui chë júne juénakun bíchaa am huéria, ¹⁷entok bem nokäu sähua kaa yoyoremta bénasi yoret kíkkimu. Júnelim ayula, jü Himeneo entok Fileto. ¹⁸Lútüriatam sékana bíchaa tö sájaka, täbuiasi jiaahua: “Jänituk jume kókkolam béja jíabitesula.” Inélim jíaka, huatem Diosta súaleme huitti Diostat éehuamta kóm táb-ria. ¹⁹Të Diosta noki kutti káttek, jöjterita jípureka: “Am täya jü Señor, jume ä áttiirim”; entok: “Símetaka huame kusisi Cristota téhuampo áu nokame, juéna böotam tóijnake.”

²⁰Të buére jóapo yún jita yáataka áma ayka, oropo entok platapo yáataka, entok huate kútapo yáari, huate éntok babupo; ímëri huate jita musála machik áy jo béchïbo, huate éntok kía jita chícha machik áy jo béchïbo. ²¹Të ínëli jü jábe chícha machik áu úhuaakame huéchiapo tahuanake, Diosta úttíluhäpo. Ä nésauo huépulta bénasi áu nüyeka, Señorta béchïbo, símeta ára jonake; entok kaa áu ámpolnake, türi tékilta béchïbo.

²²Huaka jübua yótuahuäpo kaa huéeläpo jita musáulihuamtë tójaka lútula jíäpsa, Diostat éaka, yore nákhuaamta jípureka, entok yánti jíapsihuamta, jume kaa chícha machik jíäpseka kusisi Señortau nokammaki. ²³Ake ä tójja, juka kía nok nássuahuamta, bueítuk jünéaka, náu nássuahuamta ä huériähui. ²⁴Jü Señorta tekoka tekipanuame náu nássuahuäpo kaa áu türinake; ál-la símemmak tülisi áu hueriunake; yúmalasi ára yore majtianake, entok jiokot anhuamta ára jípunake. ²⁵Kaa béttek jíäpseka ámeu noknake, jume ä béj-reka nok nássuame; jamak júne Dios emo am jíapsi kuaktituanake, lútüriata bem täyanakë béchïbo. ²⁶Éntokem áma emo yeu huíknake, jum diablota am sumaläpo, pereesotaka am jípurëpo, ä nésau am jotua báreka.

Ániata lütiseyo jume yoremem jachin emo nünakëhui

3 ¹Íkäre két jünëriapo yúmala: Jume taahuarim lütiseka huéeyo, jü tiempo süm éhuame yebijnake. ²Bueítuk yoremem annake, bempo jíbatu báreka, símeta bempola huáatíame, junneria jéuhua emo úttileme, bem ómtirat éame, Diosta béj-reme, bem áchayim kaa nésauta joriame, kaita baysahueme, entok kaa türik jíäpsekame; ³huatemmeu tülisi éehuamta kaa jípureme, kabeta säbuilame, jábetat kía nokame, kaa áu jíapsi yüeme, juka kaa pappeamta kaa jiokoleme, jume tühuata omtíame, ⁴jume ama

bétana jábeta bébame, jume kaa huantiachisi emo nüyeme, jume tüisi emo jítaleme, entokim juka bem áy al-leenakeu jíba huáatfame, Diosta béppa. ⁵Ímëri Diostat éehuamtam jípuremta bėnanake, tem juka tua Dios éehuamta kaa jípunake.

Katė ámemak emo türe. ⁶Bueituk ímëi ínel jóahuammet kimuka, am núk sásaka, jume ili jáamuchim, pereesom bėnasi, kaa türik ámet áusülik. Jü kaa túhua kaa huéeläpo ámet ayuka am huíksime. ⁷Ímëi jíba jita emo majtia, tem kara ä jájame, juka lútüriata, ä täya béchĭbo.


⁸Jáchin jü Janes entok Jambres Moiséjtam bėj-reka jáptek, ínëli kėtchi, ímëri lútüriatam bėj-reka kaate; bueituk jita täyahuäpo emo náyotehuame ámet tápuni, entokim Dios huáatihuäpo kaa jehuiteriari. ⁹Tem bėja kaa bát bíchaa kannake; bueituk jü kaa tüisi bem anėu simem bėtana täyana, huámëi bėnasi.

Pablo nokta ä chupėpo Timoteota tejhuak jachin jita ä yáanakėhui

¹⁰Tė empo ä huéria, juka enchi ín majtiähui, jáchin ín jiapsähui huatem bíchäpo, huaka huitti éaka ín huáatiähui, entok jáchin ín Dios huáatėhui, entok jáchin yánti ín jiapsähui, entok yore nákuhamta jípureka, entok kaa huánti jíapseka simeta ára ín joähui, ¹¹Diosta kaa súaleme bėtanane guók jájjasuri, entok juka kókosi machik ín ínnėsuri. İri inou yeu sika imey pueblompo Antioquíapo, Iconiopo, entok Listrapo; tüisi ín guók jájjahuakapo bėttesi inou siika. Tė íkai simeta bėtana jü Señor

nee áma yeu huíkkek. ¹²Entok simetaka Dios huáatihuäpo Cristotamak santosi jíapsi báareme bem guók jájjanäu ámeu ayunake. ¹³Tė jume kaa tü yóremem entok jume yore bäi táttähuame, jum kaa túhuata bem joä pátäkum, chė jünem kaa túhuata jonake, huatem bäi táttähuaka, entok bāitāutaka.

¹⁴Tė empo, kate ä tójaka jíba ä johua, juka em täyakähui, entok tüisi jünéaka jábeta bėtana em ä täyalähui. ¹⁵Bueitukė ili usitaka naateka ä tatäyak, juka Diosta noki jiojteri. Ímëri aram enchi kóba súatua, jínėuriata bėchĭbo, Jesucristota súalhuä pámani.



(2^a de Timoteo 3:15)

¹⁶Jü sime noki jiojteri Diostat yeu simla, entok huéchiapo huéiye, yore majtia bėchĭbo; entok juka kaa tü ayurita yuktiaka ä ínnėtebo; entok juka kaa túlisi yáata ára rútuaktia; entok juka lútula jo báahuamta ára yore majtia. ¹⁷Bueituk jü yoreme Diosta nėsahui joamta lútula jíapsinakė bėchĭbo, simėku jita ä

araunakë béchïbo, jum tühuaata ára ä jonakëpo.

4 ¹Nésautane em mámpo yétcha, Diosta bíchäpo entok Señor Jesucristota bíchäpo. Áapo jume kókkolammet entok jiápsammet yäura nokta chúpánake, júnakoy táapo reytaka ä yepsäpo. ²Diosta nokië nooka, juebénasi júchi bénasi ínel éehuayo, entok kaa ínel éehuayo. Juka kaa tü áyurita yuktiaka, lútüriate ä ínnëtua, Diosta noki kuttílasí huèhui. Íkäre am téjhua, yánti éaka, Diosta noki jíba ájáriatukähui. ³Bueítuk tiempo äbo yebijnake; huanärim juka Diosta noki tua yúmalasi entok kuttílasí huemta kara mabetnake. Ál-lam senuk jíkkaij báreka, elésikisim ä ínnëaka, huanärim juebena yore mamajtíame náu tóijnake. Huanärim am majtianake, bem ä türepo entok ä huáatiä pámani jíbba. ⁴Entokim lútüriata kaa jíkkaij báreka ä omoutenake, cuentom kia ettejoariata ayukäu bícham kannake. ⁵Të empo símekuchë yúmalasi emo jípure; juka jiokot anhuamtë yánti éaka mabeta; evangelista tékiltë johua; símete yáuhua, juka Dios nésauta em mabetakähui.

⁶Bueítuk ínapo béja muk báare, Diosta béchïbo; jü taahuari ín simnakeu béja yúmase. ⁷Tühuapo nássuahuamtane yáasula; entokne át simsula jü böochi; Dios huátíhuamtane ín jiápsipo ëriala. ⁸Én éntok, jü coroona lútüriata huë páman täyahuame nee boobícháihui. Íkäi nee

máknake, jü Señor lútula Juez, huári taahuarichi. Entok kaa nee jíbba, të símem huame ä nákeka ä boobícháihui.

*Jita jachin am yáanakèhui
áapo am tejhuak*

⁹Bamsekë läuti nee äbo bitcha. ¹⁰Bueítuk jü Demas nee tö simla; kaa tühuaata ániat ayukamta tutüreka, jum pueblo Tesalónicau bíchaa siika. Crescente Galacia buiärau siika; Tito éntok Dalmacia buíärähui. ¹¹Lucas jíba ínomak aane. Marcoste núnuka inou ä huéria, bueítuk ára tüisi nee ania, ímí tékilpo. ¹²Tíquicotane buere joära Efesou bíttuak. ¹³Äbo síkäteke jume kapotemë inou nüpa; pueblo Troaspone am tö siika, Carpota jóapo. Jume librom entok jume pergaminom, ímërë chë júne kaa koptia.

¹⁴Alejandro jü sisíguokta tekípanuame, Diosta tühua nee tóij íaaka, juebénasi kaa tüisi anhuamta inou yáala. Áapo Señor ä béjtuanake, juka jita ä joä béchïbo. ¹⁵Émpë áa bétana két emo suaya, bueítuk ítobia kíktek, tüisi itom nokäu béj-reka.

¹⁶Tua bát nee ino nok-riäpo kaabe ínomak taahuak; símetakam nee tö sájjak. Íari bétana Áapo Dios jukai kaa ama am naíkirianake, am jiokorinake. ¹⁷Të jü Señor ínomak aane, úttiata nee mákaka, bueítuk íneli ínou huémta násuk jü Diosta bétana nokhuame ára yáatuk, síme Diosta kaa súaleme ä jíkkaijnakë béchïbo. Íneli jü leónta teni kaa nee buäka. ¹⁸Jü Señor

nee áma yeu huíknake, síme kaa türík ayukäpo, entok téhuekapo reytaka ä néshuepo nee jípu báreka nee suayanake. Símek béppa ujyoori áa béchibotunake jíbapo béchibo. Júnentunake.

*Teboteri entok Diosta
tü eäu ä chuppepo*

¹⁹Priscata entok Aquilatë tebotua, entok Onesíforota jóapo jomeme. ²⁰Erasto

pueblo Corintopo taahuak. Trófitotane éntok pueblo Miletopo tö siika, kökoremta. ²¹Séberia tiempota kee yúmayer äbo huéiye. Eubulo, Pudente, Lino entok Claudia enchim tebotua, entok síme jume hermaanom.

²²Áapo Señor Jesucristo em espíritumak annake. Jü Diosta tü éehuame enchimmaktunake. Júnentunake.